



UNDANG-UNDANG MALAYSIA

VERSI ATAS TALIAN TEKS
CETAKAN SEMULA YANG KEMAS KINI

Akta 144

AKTA KEMAJUAN PETROLEUM 1974

Sebagaimana pada 1 Jun 2013

AKTA KEMAJUAN PETROLEUM 1974

Tarikh Perkenan Diraja 30 Julai 1974

Tarikh penyiaran dalam *Warta* 22 Ogos 1974

CETAKAN SEMULA YANG TERDAHULU

Cetakan Semula Yang Pertama 1997

Cetakan Semula Yang Kedua 2001

Cetakan Semula Yang Ketiga 2006

UNDANG-UNDANG MALAYSIA

Akta 144

AKTA KEMAJUAN PETROLEUM 1974

SUSUNAN SEKSYEN

Seksyen

1. Tajuk ringkas
2. Pemunyaan
3. Perbadanan
- 3A. Kuasa Perbadanan
4. Pembayaran wang tunai oleh Perbadanan
5. Majlis Penasihat Petroleum Negara
6. Kebenaran Perdana Menteri dikehendaki bagi pengendalian penggunaan
- 6A. (*Dipotong*)
7. Kuasa untuk membuat peraturan
- 7A. Perwakilan
- 7B. Kesalahan oleh kumpulan orang dan oleh pekhidmatan dan ejen
- 7C. Bidang kuasa mahkamah
8. Kecualian
9. Peralihan
10. Takrif

JADUAL

UNDANG-UNDANG MALAYSIA

Akta 144

AKTA KEMAJUAN PETROLEUM 1974

Suatu Akta untuk membuat peruntukan bagi pengeksplorasian dan pengeksplotasian petroleum sama ada di pantai atau di luar pantai oleh suatu Perbadanan yang padanya akan diletakhakkan seluruh pemunyaan dan hak, kuasa, kebebasan dan keistimewaan eksklusif berkenaan dengan petroleum tersebut, dan untuk mengawal penjalanan aktiviti penggunaan dan pemajuan yang berhubungan dengan petroleum dan keluarannya; bagi membuat peruntukan mengenai penubuhan suatu Perbadanan di bawah Akta Syarikat 1965 [Akta 125] atau di bawah undang-undang yang berhubungan dengan pemerbadanan syarikat dan mengenai kuasa Perbadanan itu; dan bagi membuat peruntukan mengenai perkara yang berkaitan atau bersampingan dengannya.

[1 Oktober 1974; P.U. (B) 501/1974]

MAKA INILAH DIPERBUAT UNDANG-UNDANG oleh Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti yang berikut:

Tajuk ringkas

1. Akta ini bolehlah dinamakan Akta Kemajuan Petroleum 1974.

Pemunyaan

2. (1) Seluruh pemunyaan mengenai petroleum, dan hak, kuasa, kebebasan dan keistimewaan eksklusif untuk mengeksplorasi, mengeksplot, mendapatkan dan memperoleh petroleum sama ada di pantai atau di luar pantai Malaysia hendaklah diletakhakkan pada

suatu Perbadanan yang akan diperbadankan di bawah Akta Syarikat 1965 atau di bawah undang-undang yang berhubungan dengan pemerbadanan syarikat.

(2) Peletakhakan pemunyaan, hak, kuasa, kebebasan dan keistimewaan yang disebut dalam subseksyen (1) hendaklah berkuat kuasa apabila disempurnakan suatu surat cara dalam borang yang terkandung dalam Jadual Akta ini.

(3) Pemunyaan dan hak, kuasa, kebebasan dan keistimewaan eksklusif yang diletakhakan sedemikian tidak boleh dibatalkan dan hendaklah berjalan kuat kuasanya bagi faedah Perbadanan itu dan penggantinya.

Perbadanan

3. (1) Walau apapun peruntukan seksyen 22 Akta Syarikat 1965, yang berhubungan dengan nama syarikat, Perbadanan itu hendaklah dinamakan Petroleum Nasional Berhad atau ringkasnya PETRONAS.

(2) Perbadanan itu hendaklah tertakluk kepada kawalan dan arahan Perdana Menteri dan Perdana Menteri boleh dari semasa ke semasa mengeluarkan apa-apa arahan sebagaimana yang difikirkannya patut.

(3) Walau apapun peruntukan Akta Syarikat 1965 atau mana-mana undang-undang bertulis lain yang berlawanan, arahan yang dikeluarkan sedemikian hendaklah mengikat Perbadanan itu.

Kuasa Perbadanan

3A. (1) Sebagai tambahan kepada segala kuasa Perbadanan sebagaimana yang ditetapkan dalam Memorandum dan Perkara Persatuannya, Perbadanan hendaklah mempunyai kuasa untuk mengambil alih atau memperoleh melalui perjanjian, penyerahhakan, pembelian atau dengan apa-apa cara lain keseluruhan atau mana-mana bahagian daripada mana-mana pengusahaan perdagangan, perniagaan atau perusahaan dalam

apa jua bentuk kepunyaan mana-mana orang atau kumpulan orang (diperbadankan atau tidak diperbadankan) dan menjalankan atau membuat apa-apa kegiatan, sama ada yang disebut dalam Akta ini atau pun tidak, yang sebelum pengambilalihan atau pemerolehan itu telah dijalankan oleh, dan bagi maksud, pengusahaan, perniagaan atau perusahaan itu.

(2) Kuasa yang diberikan kepada Perbadanan di bawah subseksyen (1) adalah sebagai tambahan kepada dan bukannya pengurangan mana-mana hak, kuasa, kebebasan, keistimewaan dan faedah yang diberikan kepada Perbadanan oleh Akta ini atau mana-mana undang-undang bertulis lain.

Pembayaran wang tunai oleh Perbadanan

4. Sebagai balasan bagi pemunyaan dan hak, kuasa, kebebasan dan keistimewaan yang diletakhakkan padanya menurut Akta ini, Perbadanan itu hendaklah membuat apa-apa pembayaran wang tunai sebagaimana yang dipersetujui antara pihak-pihak yang berkenaan kepada Kerajaan Persekutuan dan Kerajaan mana-mana Negeri yang berkenaan.

Majlis Penasihat Petroleum Negara

5. (1) Suatu Majlis yang dinamakan Majlis Penasihat Petroleum Negara hendaklah ditubuhkan yang terdiri daripada orang termasuk mereka dari Negeri yang berkaitan yang dilantik oleh Perdana Menteri.

(2) Menjadi kewajipan Majlis Penasihat Petroleum Negara untuk menasihati Perdana Menteri tentang dasar Negara, kepentingan dan perkara yang berkenaan dengan petroleum, perusahaan petroleum, sumber tenaga dan penggunaannya.

Kebenaran Perdana Menteri dikehendaki bagi pengendalian penggunaan

6. (1) Walau apapun peruntukan mana-mana undang-undang bertulis lain, tiada apa-apa jua urusan mengenai pemprosesan atau penapisan petroleum atau pengilangan keluaran petrokimia daripada petroleum, boleh dijalankan oleh mana-mana orang selain PETRONAS, melainkan jika ada kebenaran yang diberikan oleh Perdana Menteri berkenaan dengan sesuatu urusan itu.

(2) Mana-mana orang, yang pada permulaan kuat kuasa Akta ini menjalankan sesuatu urusan yang disebut dalam subseksyen (1) boleh terus berbuat demikian tetapi hendaklah, tidak lewat daripada enam bulan dari tarikh permulaan kuat kuasa Akta ini, memohon secara bertulis kepada Perdana Menteri untuk mendapatkan kebenarannya yang disebut dalam subseksyen (1).

(3) Subseksyen (1) hendaklah terpakai bagi apa-apa urusan pemasaran atau pembahagian petroleum atau keluaran petrokimia; dan mana-mana orang yang pada permulaan kuat kuasa subseksyen ini menjalankan apa-apa urusan itu boleh terus berbuat sedemikian tetapi hendaklah, tidak lewat daripada enam bulan dari tarikh permulaan kuat kuasa subseksyen ini, memohon secara bertulis kepada Perdana Menteri bagi mendapatkan kebenarannya yang disebut dalam subseksyen (1).

(4) Jika Perdana Menteri memberikan kebenarannya di bawah seksyen ini, dia boleh, menurut budi bicaranya, mengenakan terma dan syarat yang difikirkannya patut.

(5) Mana-mana orang yang bertindak melanggar seksyen ini atau gagal mematuhi apa-apa terma atau syarat sesuatu kebenaran yang diberikan di bawah seksyen ini adalah bersalah atas suatu kesalahan dan boleh, apabila disabitkan, dikenakan denda tidak melebihi satu juta ringgit atau dipenjarakan selama tempoh tidak melebihi lima tahun atau kedua-duanya, dan dalam hal suatu kesalahan yang berterusan dia boleh dikenakan denda selanjutnya tidak melebihi satu ratus ribu ringgit bagi setiap hari atau sebahagian daripada hari kesalahan itu berterusan selepas hari pertama yang mengenainya sabitan itu telah direkodkan; dan semua jentera, alat, loji, bangunan

dan harta atau benda lain yang digunakan atau dicadang untuk digunakan dalam melakukan kesalahan itu dan mana-mana petroleum atau keluaran yang diperoleh darinya boleh dilucuthakkan.

(6) Perdana Menteri boleh melalui pemberitahuan dalam *Warta* mengecualikan sesuatu urusan yang disebut dalam subseksyen (1) dan (3) atau mana-mana syarikat atau kelas syarikat yang menjalankan urusan itu daripada peruntukan seksyen ini.

6A. (*Dipotong oleh Akta A382*).

Kuasa untuk membuat peraturan

7. Perdana Menteri boleh membuat peraturan bagi maksud menguatkuasakan peruntukan Akta ini dan, tanpa menyentuh keluasan perkara yang terdahulu, peraturan itu boleh, khususnya, mengadakan peruntukan bagi—

(a) pengendalian atau perjalanan—

- (i) sesuatu urusan atau perkhidmatan yang berhubungan dengan mengeksplorasi, mengeksploit mendapatkan atau memperoleh petroleum;
- (ii) sesuatu urusan yang melibatkan pengilangan dan pembekalan alat kelengkapan yang digunakan dalam perusahaan petroleum;
- (iii) aktiviti penggunaan dan pemajuan yang berhubungan dengan petroleum;

(b) pemasaran dan pengagihan petroleum dan keluarannya;

(c) penalti berupa denda yang tidak melebihi satu ratus ribu ringgit atau pemenjaraan tidak melebihi lima tahun atau kedua-duanya bagi pelanggaran mana-mana peraturan dan bagi ketidakpatuhan apa-apa terma atau

syarat sesuatu lesen, kebenaran atau kelulusan yang dikeluarkan atau diberikan di bawah peraturan itu;

- (d) pelucuthakan apa-apa benda yang digunakan atau dicadangkan untuk digunakan semasa melakukan pelanggaran atau ketidakpatuhan itu.

Pewakilan

7A. Perdana Menteri boleh, melalui pemberitahuan dalam *Warta*, mewakilkan, tertakluk kepada apa-apa syarat dan sekatan sebagaimana yang ditetapkan dalam pemberitahuan itu, penjalanan kuasanya atau pelaksanaan kewajipannya di bawah Akta ini selain kuasa dan kewajipannya di bawah subseksyen 3(2), 5(1) dan seksyen 7 kepada mana-mana orang yang diperihalkan menurut nama atau jawatan.

Kesalahan oleh kumpulan orang dan oleh pekhidmat dan ejen

7B. (1) Jika sesuatu kesalahan terhadap Akta ini atau mana-mana peraturan yang dibuat di bawahnya telah dilakukan oleh sesuatu syarikat, firma, persatuan atau kumpulan orang yang lain, mana-mana orang yang pada masa melakukan kesalahan itu ialah seorang pengarah, pengurus atau pegawai seumpamanya yang lain atau seorang pekongsi syarikat, firma, persatuan atau kumpulan orang yang lain atau berupa bertindak atas sifatnya sebagai yang sedemikian hendaklah disifatkan bersalah atas kesalahan itu.

(2) Apabila sahaja dibuktikan sehingga memuaskan hati mahkamah bahawa suatu pelanggaran peruntukan Akta ini atau mana-mana peraturan yang dibuat di bawahnya telah dilakukan oleh seseorang kerani, pekhidmat atau ejen yang bertindak dalam masa menjalankan pekerjaannya maka prinsipal juga bertanggungjawab terhadap pelanggaran itu dan boleh dikenakan penalti yang diperuntukkan baginya:

Dengan syarat bahawa tiada apa pun dalam seksyen ini boleh disifatkan mengecualikan liabiliti kerani, pekhidmat atau ejen

berkenaan dengan apa-apa penalti yang diperuntukkan oleh Akta ini atau mana-mana peraturan yang dibuat di bawahnya bagi apa-apa pelanggaran yang dibuktikan telah dilakukan olehnya.

Bidang kuasa mahkamah

7c. Walau apapun apa-apa jua peruntukan yang berlawanan yang terkandung dalam mana-mana undang-undang bertulis lain, sesuatu Mahkamah Sesyen mempunyai bidang kuasa untuk membicarakan apa-apa kesalahan di bawah Akta ini atau mana-mana peraturan yang dibuat di bawahnya dan apabila disabitkan untuk mengenakan penalti penuh baginya.

Kecualian

8. (1) Akta Perlombongan Petroleum 1966 [*Akta 95*], tidak terpakai bagi Perbadanan, kecuali seksyen 14.

(2) Dalam pemakaian seksyen 14 Akta itu bagi Perbadanan, apa-apa sebutan mengenai pemegang lesen hendaklah ditafsirkan sebagai sebutan mengenai Perbadanan dan sebutan mengenai perjalanan apa-apa hak yang terkandung dalam lesen hendaklah ditafsirkan sebagai sebutan mengenai perjalanan hak, kuasa, kebebasan dan keistimewaan yang diletakhakkan pada Perbadanan menurut subseksyen 2(1) Akta ini.

Peralihan

9. (1) Sesuatu lesen eksplorasi yang dikeluarkan dan apa-apa perjanjian petroleum yang dibuat menurut Akta Perlombongan Petroleum 1966, dan sesuatu lesen, pajakan, dan perjanjian yang dikeluarkan atau dibuat di bawah mana-mana undang-undang bertulis yang berkuat kuasa yang berhubungan dengan mencari gali, mengeksplorasi atau melombong petroleum hendaklah terus berkuat kuasa selama tempoh enam bulan dari tarikh permulaan kuat kuasa Akta ini atau selama sesuatu tempoh yang dilanjutkan sebagaimana yang dibenarkan oleh Perdana Menteri.

(2) Jika tempoh enam bulan itu telah tamat dan tiada pelanjutan di bawah subseksyen (1) dibenarkan, lesen, pajakan atau perjanjian yang disebut dalam subseksyen itu hendaklah tamat atau terhenti berkuat kuasa dan hendaklah dibayar kepada orang yang haknya di bawah lesen, pajakan atau perjanjian yang telah ditamatkan itu, pampasan yang mencukupi sama ada dengan cara bayaran sekaligus atau dengan cara bayaran berkala atau dengan apa-apa cara lain sebagaimana yang ditentukan oleh Kerajaan Persekutuan atau di bawah apa-apa perkiraan yang dipersetujui antara orang itu dengan orang lain yang ditetapkan oleh Kerajaan Persekutuan.

Takrif

10. Bagi maksud Akta ini, ungkapan “petroleum” ertinya apa-apa minyak galian atau hidrokarbon yang berkaitan dan gas asli yang berada dalam keadaan aslinya dan *casinghead petroleum spirit* termasuk syil bitumen dan lapisan mendak yang lain yang daripadanya minyak boleh didapati.

JADUAL

[Subseksyen 2(2)]

PEMBERIAN HAK, KUASA, KEBEBASAN DAN KEISTIMEWAAN
BERKENAAN DENGAN PETROLEUM

Saya, bagi pihak
Kerajaan
pada hari bulan 20..... dengan ini memberi
untuk selama-lamanya dan memindahhakkan dan meletakhakkan pada PETRONAS
pemunyaan mengenai petroleum dan hak, kuasa, kebebasan dan keistimewaan
eksklusif untuk mengeksplorasi, mengeksploit, mendapatkan dan memperoleh
petroleum yang berada sama ada di pantai atau di luar pantai Malaysia. Pemberian,
pemindahhakkan, dan peletakhakkan yang dibuat di bawah ini tidak boleh dibatalkan
dan hendaklah berjalan kuat kuasanya bagi faedah PETRONAS dan penggantinya.

Pada menyaksikan hal yang tersebut di atas saya bagi pihak Kerajaan
..... menurunkan tandatangan saya pada surat cara ini pada hari
bulan dan tahun yang disebutkan terdahulu di atas.

.....
.....

bagi pihak Kerajaan

.....

Tandatangan saksi:

.....
.....

Saya, bagi pihak
PETRONAS dengan ini menyetuju terima pemberian, pemindahhakkan dan
peletakhakkan yang dibuat di atas.

.....
.....
.....

Tandatangan saksi

.....
.....

Diperbuat di pada
..... hari bulan 20.....

UNDANG-UNDANG MALAYSIA

Akta 144

AKTA KEMAJUAN PETROLEUM 1974

SENARAI PINDAAN

Seksyen	Kuasa meminda	Berkuat kuasa dari
Akta A290	Akta Kemajuan Petroleum (Pindaan) 1975	01-10-1974; kecuali perenggan 2(c), s.3 dan 5: 01-05-1975
Akta 160	Akta Mata Wang Malaysia (Ringgit) 1975	29-08-1975
Akta A382	Akta Kemajuan Petroleum (Pindaan) 1977	01-05-1975; kecuali s.4: 01-10-1974
Akta A613	Akta Kemajuan Petroleum (Pindaan) 1985	01-10-1974
Akta A842	Akta Kemajuan Petroleum (Pindaan) 1993	Belum berkuat kuasa
P.U.(B)144/2010	Pembetulan	01-04-2010

UNDANG-UNDANG MALAYSIA

Akta 144

AKTA KEMAJUAN PETROLEUM 1974

SENARAI SEKSYEN YANG DIPINDA

Seksyen	Kuasa meminda	Berkuat kuasa dari
Tajuk panjang	Akta A613	01-10-1974
3	P.U.(B)144/2010	01-04-2010
3A	Akta A613	01-10-1974
6	Akta A290	01-10-1974 kecuali s. 2(c), 5 dan 6; 01-05-1975
6(3B)	P.U.(B)144/2010	01-04-2010
	Akta A382	01-05-1975
6A	Akta A290	01-05-1975
	Akta A382	01-05-1975
7	Akta A290	01-10-1974
7A	Akta A290	01-05-1975
7B	Akta A290	01-05-1975
7C	Akta A290	01-05-1975
8	Akta A290	01-10-1974
8(2)	P.U.(B)144/2010	01-04-2010
9	Akta A290	01-10-1974
	Akta A382	01-10-1974
